



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim

tiryimyim@aolima

tir yimyim

TAPAK 3

Babar lenisüba nung Pakistan team NZ den asayatsü

'PM Modi ya shishilembar 5-6 indang hadir lir': Rahul Gandhi



VOL. XXI ISSUE NO. 184 (ADOK 184) DIMAPUR RASEMNÜ (WEDNESDAY) RONGCHII (APRIL) 17, 2024 ₹ 5.00

Jangpetkong AC nung Dr. Chumben atema nüboyimtsü

Mangkolemba, April 16, 2024 (TYO): Transport and Technical Education Advisor

Temjenmenba-i 29 Jangpetkong Assembly Constituency kübok unit ajak nung PDA consensus candidate Dr. Chumben Murry atema nüboyima senzüogo.

Advisor Temjenmenba-i unit balala sema senzüdang constituency renloksü asoshi temulung agüjang ta public ayongzük. Iba atema constituency nung alirtemi sorkar den tesentaktep tajung ayutsüla ta pai ashi.

Jangpetkong Assembly Constituency nung alirtem asoshi maongka tajungtibaji Lok Sabha election ya lir aser PDA consensus candidate nem takok tulu ngudaktsüsüla. Iba ama election results ajanga nübortemi NDPP aser PDA sorkar pusemba sayutsü aser constituency nung terenlok mapa bushidang ajangzüksü, ta pai ashi.

"29 Jangpetkong AC nung terenlok agi anünga lir anungji Khristantem anema olulu jembiba ajanga manisadaktsüsüla. Asen constituency nungi taoba MLA BJP nungi liasü saka iba ajanga asen tamangba yimsü mesüra libaliro nung timtem kecha bentsür aruba mali" ta Temjenmenba-i metetdaksü.

PDA consensus candidate Dr. Chumben Murry-i NDPP candidate ka ama Naga nung temeten kümzüka ayutsü aser taginübatem asoshi noktaker. NDPP ya regional party ka lir aser kodanga Naga nung temetenem anema meinyaktsü ta NDPP Working President, N. Bendang Jamir-ia ashi.

State sorkari Centre den Citizenship Amendment Act (CAA), Free Movement Regime aser arrtsü atsüdangtsüba onüktem lemsatepogo. NDPP-i aniba sorkari merangba ajanga

CAA kübok Nagaland madener aser state sorkarisa arrtsü atsüdangba aser FMR agienba anema bangzüng ka renema lir, ta Bendang-i ashi.

Rio-i aniba sorkari Naga nung taginübatem anema kodanga meinyak aser NDPP-i teti Naga nung temeten aser taginübatem kümzüka ayutsü ta paisa ashi.

PDA consensus candidate nem vote enoktsübaji Khristantem anema party ka nem enoktsüba ama asütsü ta arogo lennirtemi temeshi sabang nungi jembiba aitsür. Olulu meproksüla aser tamangba yimsü o yimtenren mapa memeyokteptsüla ta paisa ashi.

Centre nung BJP-i aniba sorkar lir anungji NDPP-i parnok den tesentaktep ayutsüla. Nagaland ama state tila kati Centre nung sorkar yimsü asüba telok den tesentaktep tajung ayutsüla, ta Bendang-isa ashi.

India ya Hindu nung teimba ser aliba linük ka lir aser Hindu nung rongnung talila bilemloka oa inyakertem alibaji tim dang. Congress-i sorkar yimsü asüdang nübo agi tangar memenepertem dak tashiyim mapa inyakba atalokogo. Talisa Congress yimsüsüba mapang missionary ka aser par kibong mi agi rongset anungji arogo mesüra opposition-i election nung tamangba yimsü tsütsü tashiyim inyakba mejembitsüla, ta paisa metetdaksü.

Congress indang manifesto nung LGBTQAI+ nung civil union pusema lir aser iba ya Naga sobaliba aser Khristan yimsü anema lir. Anungji nübortemi olulu dak mamangtsüla aser Naga nung taginübatem kümzüka ayutsü atema PDA candidate nem vote enoktsüsüla ta Bendang-isa ayongzük.

BJP ya yimjung atema; Congress-i Naga nung azitokshi: Imkong Imchen

Kohima, April 16, 2024 (TYO): BJP ya yimjung atema saka Congress-i Naga nung azitokshitsü ta Information & Public Relations and Soil & Water Conservation Advisor Imkong L. Imchen-i ashi.

Social media nung aser ano arogotem den Congress party-i BJP aser Lok Sabha asoshi PDA consensus candidate Dr. Chumben Murry anema jembiba atema Advisor Imkong-i iba ya ashi.

Nagaland nung Lok Sabha election nung toktepa telok tongtibaji NDPP aser Congress lir aser BJP metokteper. Dr. Chumben ya NDPP-i shimteta PDA consensus candidate lir saka telok aser nisung balalai BJP aitsür, ta pai ashi.

BJP-i linük nung Khristantem reshikangshir ta Nagaland nung nübortemi social media nung aser ano arogotemi jembir saka tai tongloksüba ajak ya shitak masü ta Imkong-i ashi.

"BJP ya Naga nung asoshi aser PDA consensus candidate ya Naga nung atema ta nisungtemi metettsüla. Linük nung tamangba yimsü dak sendakba nung tashiyim inyakba aruba osangtem jangjatepa aodang teimba ka tiyazü yanglua prokshiba putetogo. Tashiyim mapa ya shitak atalok asübo FIR tem benoker lila saka Congress Party-ia ken o kecha mebenok aser iba tetezüji tiyazü lir" ta paisa ashi.

India nung Khristan nütsüng

yongsük kanga ishika dang lir aser ibaji linük nütsün yongsük nung 2% shi ka dang. Ajistiaka Hindu nung 80% tema lir saka Constitution of India ajanga tamangba yimsü nüjiso agütsür, ta Imkong-i ashi.

Nagaland State Assembly nung MLA 60 prong Khristan dang lir. Murry ya Khristan tamanger ka lir aser NDPP ya regional party ka lir aser Nagaland assembly nung political party ajaki NDPP pusemer, ta paisa ashi.

1950s nungi 1970s tashi Naga putiotsü meyipa repringdangra taoba Prime Minister Jawaharlal Nehru lenisüba kübok Congress sorkari Naga nung dak tashiyim inyak. Nagaland nung tenla kitem military concentration camps kümdaktsü aser tenla ki telung nung tebang agi meshitetba tashiyim mapatem inyakba liasü, ta Imkong-i ashi.

Nehru-i tekong merangba ajanga Naga nung kanga akoksa aser item tatalokba Naga nung kodanga mamatsü. Naga nung dak tashiyim mapa inyakbaji Congress party ajanga inyakba liasü ta paisa ashi.

Lok Sabha elections atema Congress manifesto nung Constitution of India nung Arla 15 aser 16 yanglushitsü aser LGPQT maparen agizüksü shia lir. Nagaland ya Khristan 99% aliba state ka lir aser ibala tebilemba magizüker, ta Advisor Imkong-isa shisem.

"Kümsa küm Naga nung dak tashiyim mapa inyakba aruba sülen Congress-i homosexuality ajungketnür aser iba ya Laishiba nung Rom 1: 21-32 anema lir" ta pai ashi.

BJP ya yimjung atema lir aser Central leadership-i kodanga state BJP dang tenla kitem army camps akümtsü meshidang, ta paisa shisem.

Narendra Modi-i kümsük asema atema Prime Minister inyaksü aser Murry-i Parliament nung Naga nung atema noktaksü. Naga nungeri linük madak yimsü asüba party den putepa alitsüla ta paisa ashi.

Murry-i takok ngura pai assembly nung lemtetba onüktem Parliament dangi abentsü aser iba nung UCC aser CAA mapa meinyaktsüba dena lir. Nagaland Assembly-i Assam nung against Christian healing anema yangluba bill benoka lemsatepogo aser ibaji Assam sorkar dangi benogo, ta Imkong-isa metetdaksü.

"BJP sorkari Indo-Myanmar arrtsü nung Free Movement Regime agientsü lemtetba pusema nungiter. Centre sorkari iba ya inyakba ni kanga pelatsü. Arrtsü telatet shitak ka alitsüla aser arrtsüji atsüdangtsüla. Helicopter temia saksaka stütsüsa atsüji kanga talang atsüsüla" ta Imkong L Imchen-isa ashi.

Naga nung arrtsü adena senzusenbongtsü atema Centre sorkari inyakyim latettsü saka arrtsü atsüdangtsüla ta paisa ashi.

Naga nung 4-i CSE 2023 tatidang nung takok angu

Dimapur, April 16, 2024 (TYO): Union Public Service Commission (UPSC)-i ketdangtsüba agiba Civil Services Examination (CSE) 2023 nung Naga nung 4-i takok nguteta Nagaland asoshi konang bentsür aruogo.

UPSC examinations, 2023 nung Tolino Chishi-i All India

Rank (AIR) 431, la sülen Alemyin Isaac AIR 749, Imsurenla Longkumer AIR 774 aser Chubalemba B Chang AIR 915 nungeri takok angu.

Mongulbarü (April 16) UPSC-i Civil Services Examination (CSE) 2023 indang results yimjak nung metetdakja liasü.

UPSC indang official website - upsc.gov.in nung results sangdonga lir.

UPSC Civil Services exam 2023 nung Aditya Srivastava-i mezüngbuba, Animesh Pradhan-i tanabuba aser Donuru Ananya Reddy-i tasembuba jenjang takoktem ngutetogo.

Congress-i aniba INDIA bloc sorkari Naga yimten latettsü: Randeep Surjewala

Dimapur, April 16, 2024 (Agencies): Centre nung Congress-i aniba INDIA bloc sorkar kümra Naga yimjung olemtep angatetepa tembangtsü ta Congress lennir Randeep Singh Surjewala-i ashi.

Lok Sabha election nung Congress candidate S Supongmeren Jamir atema Dimapur nung nüboyimba sentong ka agidang AICC general secretary Surjewala-i "NDPP ya 'No Direction Propaganda Party' aser BJP ya 'Bahut Jhoothi Party' lir aser telok anaprongi nangzükba meinyaktem" ta ashi.

BJP aser RSS-i Constitution anema linük nung tamangba yimsü aser sobaliba balala dak kongshir ta pai tai tongloksü.

"Centre nung sorkar kümra

Congress-i aniba INDIA bloc-i Naga yimten latettsü. 2015 nung Framework Agreement nung sign sütep saka tesüba küm 9 tsüngda kecha matalok. Nisung shingia iba agreement nung aliba onüktem mangu. Iba Framework Agreement ya Modi'er tiyazü tenangzükba ka lir" ta Surjewala-i ashi.

"Rajiv Gandhi lenisüba kübok Congress-i Assam, Mizoram aser Punjab nung accord balala nung sign sütep. Nagaland nung alirtemi Supongmeren Jamir Parliament-i yokra nübortemi aginüba ama Congress-i Naga yimten tebilemstü angatetepstü" ta paisa ashi.

Congress-i Constitution nung Arla 371A mapa tenzük aser iba ajanga Naga sobaliba, temzüng-

ozüngtem, inyaksangshi aser ali o rongsen kibur kümzüka ayur saka BJP-i Constitution melennür, ta paisa shisem.

BJP den teyaritepertemi linük nung kin aser sobaliba temeyoktep dak mapa inyaker aser tesempatep den telemsa adoktsü ajungmesor. BJP-i Constitution nung teka aitsü meranger, ta Surjewala-isa shisem.

"India nung model ana lir ka BJP-Modi model aser iba yagi tashiyim agi ketdangtsür, ozüng benoker, tashiyim amshir, amokmerener. Külen Congress model lir aser iba ajanga aria bilemstü, meimteptsü, olemteptsü, angatsü aser angatetepstü lenmang bushitsü meranger" ta pai metetdaksü.

2023 Nagaland Assembly nung NDPP-BJP teloktepi "election for solution" yimyim ayimoktsü saka tanü NDPP ya "No Direction Propaganda Party" aser BJP ya "Bahut Jhoothi Party" lir ta Surjewala-i ashi.

NDPP-BJP candidate Chumben Murry-i Citizenship (Amendment) Act, Uniform Civil Code, Free Movement Regime agienba amala Nagaland dak sendakba onüktem mejembitetsü ta paisa ashi.

"Dr. Chumben Murry ya nisung tajung ka lir saka pa ya RSS o BJP den teyariteper ka lir anungji ibaji majung. Ni takok ngura Parliament nung Naga nung atema jembitsü" ta S Supongmeren Jamir-i ashi.

Mongulbarü Nagaland

Pradesh Congress Committee (NPCC)-i ayongzükba sentong nung AICC president Mallikarjun Kharge adentsüba liasü saka pa temang majungba agi shilem magitet.

Iba sentong nungsa Rising People's Party (RPP) president Joel Naga-i o jembidang RPP-i Congress candidate Supongmeren pusema nungitba nenshia metetdaksü.

Nagaland nung April 19, 2024 nü Lok Sabha election agitsü. Taküm election nung People's Democratic Alliance (PDA) candidate Dr Chumben Murry, Congress & INDIA bloc candidate S Supongmeren Jamir aser Independent candidate Huyithung Tungoe Lotha nung tokteper.

ABAM ketdangsürtemi Mokokchung DC Office semdang



Dimapur, Rongchii/April 16 (TYO): 18th Lok Sabha Election tonga aruba mapang ABAM office nungi Executive Secretary-i anir tenzükertemi April 16, 2024 nü Deputy Commissioner, Mokokchung office semdanga sarasadem sendong tajung ka agia liasü.

Sarasadem agiba mapang Mokokchung DC, Thsuvisie

Phoji ajanga election dak sendakba mapa nung yimtsung nüburtemi kanga amalitepa arudar aser yamai dang ora takok angutsü, ta ashi aser paisa ABAM dang nungdaka aliba mapang nung Tsüngrem dang tashi meshia sarasademtsü aruba asoshi pelaba lemsatöp.

Kasa mapang Rev. Dr. Mar Pongener, Executive Secretary,

ABAM ajanga tongpang kanga tesashi saka ania me?umi inyaksü ajungshi.

Ano election mürekteta agitettsü asoshi lenirtemi tasü ita pei ataba mapa takok ngua inyaksü ajungshia liasü. Maneni ajak longjemer ochiba nung election müreka agitettsü tamang ka yur inyakdi ta ayongzüka sarasadema liasü.

DoHFW ajanga 'heatwave advisory' agütsü

Dimapur, Rongchii/April 16 (TYO): State tesem balala nung kongshia tang heatwave aliba dak sendakba nung Department of Health and Family Welfare (DoHFW) ajanga nüburtem dang kumdanga alitsü ashi.

Shidakba nung temperature kanga aikabo masütsü akok, saka nüburtemi bilema aliba normal temperatures nungi tatsükba akumba ajanga timtem alitsü, ta ashi.

Nüburtem kumzüka alitsü mechi DoHFW ajanga inyaksü aser meinyaksü yimya aser maparen kar lemsatöpogo.

Tzüraba maliyonga tzü peria ajemtsüla aser senzüsempongba mapang tzü bener senzütsüla. Kidang yangluba tasen tzü, buttermilk aser süngjang-lijang tzü nung metsü inoker ajem nung ajungtsü. Tzüma-züngi (watermelon) aser züngi (cucumber) ama tzü aliba süngjang-lijang aser aonsotsü achitsü ajungshir, ta DoHFW ajanga ashi.

Iba den külemi nisung shia süoshi temang nung asülökba masemtsü, sentsü tesangwa cotton süoshi asemtsü, anü boa jajadang anüshi mesüra korang amshitsüla aser tsüngsem asemtsüla.

Radios, TVs, osangkaket aser India Meteorological Department (IMD) website <https://mausam.imd.gov.in/> ajanga tzüngsang-mopung indang meteta alitsü kanga tongtipang, ta ashi.

Tzüngsang-mopung tatsük nungi kumzüka alitsü asoshi nüburtem akok tashi kilong mesüra akum nung alitsü ajungshir. Anüngdang windows aser curtains shibangtsü aser mopung temokong aittsü asoshi aonung lapoka ayutsüla. Kima mesüra moabu nung mapa inyaksüsa kumra, anepdang mesüra nikongdang ama temokongba mapang nung inyak tajungba, ta DoHFW ajanga ashi.

Kinü tanur, tila-tanur, mashisa aliba tetsürtem aser temang manemi alirtem densema mela-mela timtem ajurutsüpurtem anogoshi meita reprangtsüla aser tali anepalua temulung agütsütsüla.

Teintet rogo mesüra shiranger kija alirtem temang kanga junga reprangtsüla. Tzü temokong nung tetsung metena ayuba, fans aser spray bottles amshiba aser sü tai mesüra towel temokong amshiba ajanga temang tajungba

mokongdaksütsü, ta ashi.

Mapa inyaker temia jelia mera balala agitsü nungdaker. Tajemtsü tzü temokong aser mapa inyaksü atema akum agütsütsüla, mapa tasak-taret temokongba mapang nung inyakdaksütsüla aser anisüngzük mapang talangba aser timba agütsütsüla, ta DoHFW ajanga ashi.

Tzüngsang-mopung atsükba ajanga shirangba meteta mera agia anepalutsü asoshi mapa inyakdaksür temi mapa inyaker nem angatedaksütsüla. Mashisa aliba mapa inyaker mesüra temang mejungi alirtemi tatsük nung mapa inyaksü atema doctor den asüngdangteptsüla.

Lokti adenshiba mesüra saisapong mapang temang nungi tatsük adokba, anü indang-indanga abuba, nisung tali sentepba aser tzü, chiyongtsü mesüra akum agi anüngba ajanga tatsük dak sendakba shirang-shiko tali adoker ta nüburtemi metettsüla.

Iba amala tesemi aortem teti tzü jema alitsüla, temang mokonga ayutsüla aser temang meshidaker ama kumra doctor bushitsüla, ta DoHFW ajangasa ashi.

CMHIS atema sorkar mapa inyaker aser pensioner dang metetdaksür

Dimapur, Rongchii/April 16 (TYO): Sorkar mapa inyaker aser pensioner shirnok November 1, 2022 nungi December 31, 2023 tashi Medical Treatment agiba atema CMHIS (EP) tenzükba mapang pei temang reprangba asoshi pei sasa sen menoka ali, parnoki March 28, 2024 nü DoHFW ajanga sangdongba ama cost of treatment meyipa meshitetsü temsüa lir, ta Nagaland Health Protection Society indang CEO Thavaseelan K, IAS ajanga sangdong ka nung metetdaksü.

Iba amala senotsü meyipa

meshitsü atema nungdakba documents agütsütsü/sayutsü asoshi online portal ka tang teyangludak lir aser yakta renemtsü.

Iba portal ya lapokba sülen <https://cmhis.nagaland.gov.in/> nungi medical expenses tem reimbursement atema documents tem renema alitsü ayongzüker, ta sangdong ajanga ashi.

Iba portal nung takok ngua application agütsütsü asoshi eligibility criteria aser nungdakba documents indang tejangja shia lir, ta ashi.

KMC administrator-i polling personnel anepalutsü

Dimapur, Rongchii/April 16 (TYO): Deputy Commissioner and District Election Officer, Kohima, Kumar Ramnikant, IAS ajanga Lok Sabha asoshi aruya aliba General Election 2024 dak sendakba nung sangdong ka agütsüba nung, polling personnel anepalutsü asoshi Administrator, Kohima Municipal Council, T. Lanusenla Longkumer ya nodal officer

ama shimer, ta shi.

La den mobile number 8974624861 ajanga jembitsü akok.

Polling Teams ajunga atema Officer in charge-i nungdakba mera ajak agitsü, ta ashi.

Nungloktsüba mapa ajak mapang shidak nung renemtsüla aser osangtsüsang shidak agia amalitep akatsüla, ta sangdong ajangasa ashi.



Tuensang district kübok Lok Sabha Election 2024 atema polling personnel asoshi tasem buba aser tatembangba training GHSS Auditorium, Tuensang nung April 16, 2024 nü agia liasü. ADC Tuensang, Thungchanbemo Tungoe ajanga polling personnel den o tatsüka jembidang polling day mapang aser EVMs amshiba mapang yimya shidak amshitsü ashi aser polling station nung mepetmesü adokra Control Room nem osang agütsütsü paisa metetdaksü.

Kohimanung May 10 nü Nagaland Potato Festival alitsü

Kohima, Rongchii/April 16 (TYO): Tejangraba aser tangatetba kasa aliba nisung telok ka llungjemer Kohima district kübok Jakhama Local Ground, Jakhama village nung May 10, 2024 nü Nagaland Potato Festival 2024 ayongzüksü sentong lir.

Iba osang ya Event Director Dr Teputo Richa den event coordinator Mhasheneinu Zao Richa aser event manager Vikukhoto Rolnu nungeri Oakland Boutique, D'Block nung Mongulbarnü osangbener senden ka nung ashi.

Iba benjong ya tang kanga nungdaka lir aser iba sapang yagi Jakhama village aser Southern Angami region nung aliba aluyimertem kising masü saka dang district nungi aluyimer tema yaritsü, ta Dr Richa-i ashi.

Nüburtemi potato (alu) kanga sapoa achir saka aluyimer temi nüburtemi nungdakba ama mezüsenteter, anungji iba benjong ya ayongzüksü shisatet, ta pai ashi.

Yimdak-yimtsung nung alu tsünür timbai tang tashi akhi yimya dang amshir, anungji modern technology aser machinery amshitsü mapang tongja tongogo, ta pai ashi.

Traditional aser modern farming meyoktepba ajanga sen tajemba indoka timba züsentettsü aser ali temu wazüka yutettsü, ta ashi.

Capacity building aser technical teyari nung aluyimba nung amendaka aliba enterprises jenjang

temabai ajungkettsü aser yariteptsü nükjidong nung iba benjong ya ayongzüksü, ta Dr Richa-i ashi.

Ajidang masü onoki sustainable market linkages agütsütsü aser aluyimer nem domestic aser international market den sendakteptsü lenmang sayutsü, entrepreneurial skills, business management aser marketing techniques tem sayutsü, ta ashi.

Event manager Rolnu-i iba benjongmung sentong tongmelang agi lemsatöpba mapang, state kübok tesem balala nungi vendors 100 shi adenshia stalls amenoktsü aser organic potatoes tem jenjang talang agi ayoktsü, ta ashi.

Iba benjong nung traditional games, konten-menü sentong, biggest potato competition aser best stall award amala alitsü, ta pai ashi.

Iba benjong mapang potato plantation atema demo session ka agütsütsü.

Tanü aluyimer temi modern technology & machineries, scientific method of cultivation, ki o jen amala peria mangur, potato seeds mesüra storage facilities nung sen tali meshir, ta event coordinator Richa-ia ashi.

Iba benjongmung ya Agriculture Department, Nagaland aser Community Seed Bank Jakhama, Farm Craft Enterprises, The Green Caravan Nagaland nungertem teyaritep nung ayongzüksü.

| NAGALAND POLLUTION CONTROL BOARD | | | | | | |
|---|---------|----------------------------|--------------|------------------|------------|---|
| Signal Point, Dimapur - 797112, Nagaland Tel.: 03862-245727, TeleFax: 03862-245726 Website: www.npcb.nagaland.gov.in e-mail: npqb2@yahoo.com | | | | | | |
| AMBIENT AIR QUALITY FOR KOHIMA AND DIMAPUR CITY | | | | | | |
| KOHIMA ASER DIMAPUR NUNG MOPUNG MERÜK-MEMERÜKBA JENJANG | | | | | | |
| Sl. no | City | Location of air station | Type of area | Monitoring dates | | Permissible limit As per the National Ambient Air Quality Standards "Iba tasazük alemabo metudaksütsüla" |
| | | | | 09.04.2024 | 11.04.2024 | |
| 1 | Dimapur | Bank Colony | Residential | 201 | 187 | 100 µg/m ³ |
| 2 | | Dhobinala | Commercial | 234 | 231 | |
| 3 | | NPCB Office, Signal Colony | Residential | 172 | 134 | |
| 4 | | Tenyiphe, Chumoukedima | Commercial | 125 | 78 | |
| 5 | | Nagarjan | Residential | 186 | 141 | |
| 6 | | Viola Colony | Residential | 132 | 92 | |
| 7 | | Burma Camp | Commercial | 184 | 133 | |
| 8 | Kohima | Opposite NST Office | Residential | 130 | 138 | |
| 9 | | PWD Junction | Commercial | 136 | 144 | |
| 10 | | High School Junction | Commercial | 200 | 180 | |
| 11 | | Midland (Upper) | Residential | 134 | 86 | |
| 12 | | Forest Colony | Residential | 129 | 105 | |

Iba osang ya nüboritem ajangzüksü atema Nagaland Pollution Control Board-i agütsür.

'PM Modi ya shishilembar 5-6 indang hadir lir': Rahul Gandhi



Kerala kübok Kozhikode district nung Lok Sabha election atema nüboyimba sentong ka nung Congress lenir Rahul Gandhi tangokba noksa nung angur.

New Delhi, Rongchii/April 16 (Agencies): Congress lenir tejen Rahul Gandhi-i Mongolbarnü Ato Kilonser Narendra Modi aija, pa ya India nung shishilembar 5-6 indang hadir lir, ta ashi.

Gandhi-isa, electoral bond system aija jembia aser ashiba agi, iba ya nüburtem nongshitsü atema amshir, ta ashi. Paisa, CBI, ED, aser Income Tax Department amala sorkar agency tashitaittem shishilembar amokmerentsü atema amshir, ta ashi.

Kerala kübok Kozhikode nung election atema nüboyimba mapang Rahul Gandhi-i, "yimtsüng aser jila tilatem ajak nung yimtung nung tangar a m o k m e r e n a rakzükrakdemertem karbo lir. Malayalam nung iba dang ya 'kolla adikkal' (loot) ta ajar saka Modi-i iba dang electoral bonds

ta ajar. Auertemi yimtung nung inyakba kasa ya PM-i international jenjang nung inyaker," ta ashi.

Ghandi-isa, shishilembar amokmerentsü atema BJP-i aniba Centre sorkari tasa balaka amshir, ta ashi. "Electoral bond jenjang nung amokmeren ya kanga tebenjaba lir. ED, CBI aser Income Tax nung inyaker arutsü, parnoki ken o ashishitsü aser tatem nung parnoki nü indang business ya Adani nem agüjang ta ashir," ta Wayanad LS constituency nung Congress MP yagi ashi.

Pai ashiba agi, iba amala inyakyim ajanga Adani-i Mumbai airport taoba kibur dang nung agiogo. Ghandi-i, tanga ken o nung iba amala tasa amshiba sülen shishilembar emi electoral bonds ajanga BJP nem senotsü agütsüogo, ta ashi.

"Pa indang interview nung

pai alima nung ochi mashi inyakyim tulutiba; electoral bond scheme puküma jembitsü merang, koba ajanga BJP-i India nung shishilembar dang nung sen crore meyirejang aika rakzükrakdemer," ta Gandhi-i ashi.

PM Modi-i ANI den interview ka nung electoral bonds inyakyim aitsüba puküma jembia liasü.

Pai ashiba agi, electoral bond scheme ajanga teyari agütsüba company 3000 rongnungi ED amala bushisüngdangba agency temi company 26 asadangogo. Paisa, item company tem rongnung 16-i tang bushisüngdangba aliba mapang bond alizükogo, ta ashi. "Company 16 nung senotsü shilem 37 BJP dangi aoer aser tanungba shilem 63 opposition party tem dangi aoer," ta pai ashi.

Kejriwal-i pa indang doctor den sensaksemtsü temelaba meshi

New Delhi, Rongchii/April 16 (Agencies): Delhi chief minister Arvind Kejriwal-i, pa teti temang anepaluba doctor den video conferencing ajanga sensaksemtsü asoshi court dang temelega meshiogo.

Osang ajanga ashiba agi, pa blood sugar jenjang asephir aser iba atema pa indang doctor den sensaksemner.

Special Judge Rakesh Syal-i ED dang iba application dak sendakba nung telanzüba agütsütsü tuyuogo. Okadak iba ken o ya April 18 nü angadantsü.

Kejriwal indang counsel-i pa indang blood sugar jenjang asephir aser 46 tashi luogo, ta court dang ashi.

Iba dak sendakba nung pa hopta nung asembenbo pa indang doctor den

sensaksemtsü asoshi temelaba agütsütsüla, ta counsel Vivek Jain-i ashi.

Kasa mapang nung Special Public Prosecutor (ED) Simon Benjamin-i ashiba agi, tepuokdak facility peria lir aser pa idakji temang tendangtetsü.

Kejriwal indang counsel-i, pa temang anepalutsü atema ED-i kechiba anemer ta ashi.

Delhi Excise Policy ken o nung ED-i apuba sülen Arvind Kejriwal tang judicial custody nung lir.

Delhi Court-i Hombarnü Arvind Kejriwal maneni April 23 tashi judicial custody nung ayutsü atema tetuyuba agütsüogo.

Taoba mapang AAP lenir Kejriwal-i, ED-i pa apuba aser excise policy ken o dak sendakba nung pa sota ayuba

dak sendakba nung Delhi High Court-i obendang agütsüba anema Supreme Court nung ken o ka benoka liasü.

Apri 9 nü HC-i, pa tepuokdak nung chioktsü atema mepeshiba magizüki liasü.

High Court-i ashiba agi, ED-i jaokba tekuben tashi thitsüba sülen pa tashi mangaba atema aputsüsa liasü.

High Court-i obendang agütsüba anema mepeshiba mapang Kejriwal-i ashiba agi, Prevention of Money Laundering Act (PMLA), Section 19 kübok pai aitsütsüsa Enforcement Directorate ket nung kecha kuli mali.

Kejriwal ya Delhi excise policy 2021-22 senotsü ochi mashi ken o dak sendakba nung ED-i March 21 nü pua liasü.

AAP-i Punjab LC election atema candidate 4 sangdongogo

New Delhi, Rongchii/April 16 (Agencies): Aam Aadmi Party (AAP)-i Mongolbarnü taruba Lok Sabha election atema Punjab nung party candidate pezü tenüng sangdongogo. AAP-i tanga candidate tem den Ludhiana menden nung sitting MLA Ashok Parashar shimogo.

Aam Aadmi Party lenir Jagdeep Singh Kaka Brar Ferozpur nung, Amansher Singh (Shery Kalsi) Gurdaspur nung, Pawan Kumar Tinu Jalandhar nung aser Ashok Parashar Pappi Ludhiana nung tokteptsü renema lir.

AAP-i Punjab nung shimba candidate pezü rongnung asembo tang state nung MLA lir. Mongolbarnü sangdongba lenirtem rongnung Pawan Kumar Tinu ya dang taoba mapang MLA lir aser tanungba asemprongla tang state indang MLA tem lir.

AAP national general secretary Sandeep Pathak-i X ajanga, "Ferozpur nung Jagdeep Singh Kaka Brar, Gurdaspur nung Amansher Singh Kalsi aser Ludhiana menden nung Ashok Parashar Pappi tokteptsü," ta metetdaksü.

Brar ya Muktsar assembly menden nung, Kalsi ya Batala

menden nung MLA aser Pappi ya Ludhiana Central assembly constituency nung MLA lir.

Taoba MLA Pawan Kumar Tinu-i tawa Shiromani Akali Dal toktsür AAP nung denogo. Iba osang sangdongba sülen AAP-i Punjab nung menden 13 prongla atema candidate tem sangdongogo.

AAP ya INDIA bloc nung shilem ka lir aser parnoki Punjab nung Lok Sabha election parnok kija tokteptsü telemteba agiogo. Punjab atema general election ya June 1 nü tatembangbuba phase nung agitsü.

Kasa mapang nung Congress-ia Lok Sabha elections atema candidate 10 tenüng sangdongogo, kong taoba CM Charanjit Singh Channi aser Jawaharlal Nehru University (JNU) activist Kanhaiya Kumar na densema lir.

Jalandhar nung Charanjit Singh Channi aser AAP candidate Pawan Kumar Tinu na tokteptsü.

AAP pur Punjab nung parnok kija tokteper, ajisüak Delhi nungbo parnok Congress den longjemer tokteptsü. Aam Aadmi Party pur Delhi nung menden pezü nung tokteptsü aser Congress tanungba menden asem nung tokteptsü.



Srinagar tezülen Jhelum ayong nung rong ka mekupokba sülen kinungertemi asürtem tasü mang bener aoba noksa nung angur. Iba lendong nung nisung trok asü.

India-i Maldives dangi khu bener aotsü atema tenokdangba kar agütsü

New Delhi, Rongchii/April 16 (Agencies): India-i Mongolbarnü Maldives dangi tenokdangba agütsür aliba tenüngdakba oset/chiyongsü bener arotsü atema tenokdangba tasen agütsüogo.

Director General of Foreign Trade sangdong ka ajanga ashiba agi, osettem ya Mundra Sea Port, Tuticorin Sea Port, Nhava Sheva Sea Port (JNPT), aser ICD Tughlakabad nung amenoka aliba customs station tem nung dang bener aotsü melatsü.

April 15 nü India-i, chiyongsü aser oset teku Maldiv-i tatakzük ka dang belener aotsü atema tenokdangba agütsür aliba agintsüogo, kong potato, onion, entsü, jang, wheat flour aser shini densema liasü.

Temetetsü kaji tenüngdakba osettem belener aotsü atema tatakzük koba agizüka lir iba ya linük ana tsüngda 1981 kum bilateral tesendaktep tenzükba sülen tang timba asütsü. Maldives nung kisü jensüba

industry atema kanga dang nüngdaka aliba ayong lisem aser stone aggregates atema quota ya shilem 25 agi ajungketja 1,000,000 metric tone kümtsüogo.

Entsü, potato, onion, jang, wheat flour aser dal (pulses) atema quota-a ajungkettsüogo.

Kasa mapang nung, India-i taoba kum Maldives nem maneni jang, shini aser onion agütsüogo. Alima ajunga nung item chiyongsü atema India nung bener meyoktsü tenokdangba agütsür aliba mapang nunga Maldives dangibo yoka liasü.

"Neighbourhood First' policy dak ajemdaker Maldives nung human-centric development nongita yaritsü atema India bendanga agütsür lir," ta Maldives nung Indian High Commission-i iba mapa shia liasü.

Maldivi Tir Muizzu-i office mapa belenzükba sülen India aser Maldives na tesendaktep mejungi kümogo, kechiyong pai Tir election atema nüboyimba mapang India aija liasü.



Gadchiroli nung Lok Sabha election atema security personnel aser polling ketdangsütem election material bener apusoba noksa nung angur.



TIR YIMYIM YIMOBILEM (EDITORIAL)

DIMAPUR RASEMNÜ, APRIL (RONGCHII) 17, 2024

Ano tatidang ka!

Asenok asoshi election ya yimsüsür shimba sentong ka dang masü saka asenok jakla, mulungsentsü aser tamang tendangba mapa aser mapang ka lir. Aji oda, election mapang marudangbo asenok ajaki ochishia alitsü indang jembir, ajisüaka kodang election arudir sarasadema senzüsang aser senzüla to agi anir sen agi vote alia jajar. Iba kasaji election madongdangbo asenok ajaki election merüka agitsü indang jembir, saka kodang election mapang arudir Laishirtemi anir sarasadema senso candidate shimer aser proxy vote agütsütsü sentong yanglur. Tanü asenok asoshi tatidang tulutibaji Election ya kümogo. Iba tatidang ya koktet nung dang asen lima nung yimten dang masü arogo aser lokti dena jungadoktsü. Joko, election nung asenok sen aser government mapa yong yoka-yoka tanübo asenoki amangba tamangba yimsü asoshi dena shisabolua bilemetsüsa mapang ka nem asenok menepdaksüogo. Ibaji asenoki timtem agia aser takoksa arema ochi nung menokdaktetba ajanga lir. Ochi nung menokdaktetba ajanga tanübo asenok ajak Delhi nung alisang lar ama kümogo. Aji oda, Delhi nung alisangi kechi shidir hau shitaka ta ashitsüba dak alaka asenok ola maka kümadokogo. Iba ama alar tia nungi nüchi akümtsübjaji asenok ochi dangi meyiptsüla. Iba ochi dangi meyiptsüba mapangji election ya ka lir. Taoba election aika nung sen tera meshia agir asenok yimer ajak candidate ka nem vote ajak enokja aruogo. Ano, yimtsüing aika nung yimer ajak indang vote nisung kar nem dang ajendakjaa aruogo. Aji oda, election nung candidate dang kari sen meshir, kari government mapa meshir aser karibo garia meshir ta election agi election memesük vote ayokdak aser vote alidak bazaar ka lapokang mesüka asenoki election agia aruogo. Ano, election agiba mapang tesem kar nungbo nisung pua bener oa ayuba, azükba aser kilong nungi shinga maludaktsüi shibanga yutsüba mapatem inyakertemto asenok lir. Item mapatemji asenok arogo nungertemi inyaker asünungbo arogo nunga endoknütsüka saka asenokbo kiburi ashi nung dang endoker aser ajia nükta pangtaba temenen dak alaka tanga ashi auyaba, tashiyim amshiba aser ochimashiba mapatembo asenoki arogo nungi endoktsü malanga ta bilemer amai inyaka arur. Iba jagi arogo nung kar vote ayokertem aser kar vote alirtem ta vote agi shishilembartem agi sünga alir. Iba ochimashi mapatem nungi nisungi angutsüsa arogo nungi meindokyonga peisasa temulung meyi pa ochishia ali tenzüktsüla. Ashiko, Tsüngrem tsüngdangbo arogo nung endoker agizükbaji masü saka peisasa ochi mulung agi temulung meyi per ochishia alitsü tenzükba takümjiang tagizükttetsüba taküm asütsüa akok. Tanüa asenok jakla, mulungsentsü aser tamangba jenjang tendangtsü atema election ka arua lir. Iba election nung komaka asenoki ochishia shilem agiteter, patekaji asen tangatetba aser tamang jenjang asütsü. Tsüngrem dakbo amanger saka pei vote-bo ayoker, Tsüngrem dakbo amanger saka tangar meyong vote dena ajentsür, Tsüngrem dakbo amanger saka tashiyim agi akoktsü meranger ta asüba takümjibo Tsüngrem dak amanger masü Tsüngrem dak mamanger asütsü. Iba takümji Tsüngrem aser nisung tsüngdang tajung tazü masü, lendong nisung lir. Item jagi yimten, arogo aser lokti raksar. Item kibongtemji Tsüngremi masü election agi mesür, anungji kodanga tebok masünger. Yimsüsürtema pei vote yoka chira yimsüsür masü tayimer akümer. Itemji kodang asenoki jungjunga bilemdangdir, yimten nung asen temeten aser vote-ji kecha agia malizükttetba jenjang tulu aketba senti rongsen ka lir ta angatetsü. Iba tangatetba jagi dang Election tatidang ya koktettsü. Shibaibo asen tsüraburtemi alangzuka toktsüba lima aser nüboritem senyong ayoktsü? Shibaibo pei vote sen yong yoker tenüsang agüja sarasadem sütettsü? Shibaibo pei yimer vote ajak senyong yoker, yimjak nung ochishia lidi ta ajungshitettsü?

OLEMSABANG

Tangatetba aser Teindang shisatsü agi Election nung shilem agitsü ABAM-i ayongzüker

~ Rev. Dr. Mar Pongener, Executive Secretary, ABAM.
Rev. Dr. L. Lima Jamir, President, ABAM

Aruya aliba 18th Lok Sabha Election nung ajaki tangatetba (Api 3:13) aser teindang shisatsü dener indang indanga (TKe 15:2) senso tajung kaka ama shilem agitsü asoshi ABAM ajanga sarasadema tayongzükba lemsateper. Indang indanga jajartemi lendong makai jajateter aser idakji temoatsü lir. Item nisungtemi Tsüngrem pelatsüsa temeshi mapatem inyaker aser pei mulungjang nungi ochi adoka jembir. Parnok temeli nung teyazü mali aser ajak den yimjung nung liteter. (TKe 15:2-3). Saka shiri mashikoshi shisatsü dener ngasangatem aser asüküm o jembia mapatem inyaker takoksa ajurutsü (Api 28:18). Meyipshishia masü saka tangatetba aser teindang shisatsü dener inyakba nung Tsüngremi pelar. Election mapang tangatetba nung akanga maliba aser meshisadangi inyakba ajanga bener arutsüba timtem jendi asenoki ajangshia arudagi. Item tebilemetsü ajanga arogo, lokti, kibong aser kija timtemdaksüba asangsang nung ajurudagi. Ya kechiba aser shiba tai ajanga ta arok aroka shisadangtsü mapang tongja tonggo.

Nagaland ya khristan teimba aliba State ka saka ochi mashi mapa jendi jateta adokba ajanga nüburtemi temelenshi aginüba ola adoktsü tenzük. NBCC aser Associations ajak lungjemer Naga lima nung ochi mashi aser lokti temenen jateta adokba koda remsepdaktsütsü item indang lenirtem shisalemsatep sentong ka March 15, 1973, Kohima nung ayonga agi. Iba senden nung asen Aor Rev. L. Kijungluba Ao, Rev. L. Noksangla, Rev. I. Arba Ao aser Rev. Longri Ao nung tena liasü. Naga lima raksadaksüba aser süngjema melidaksüba tebushitetba ana: Election agiba Yimya aser Yi Ayokba aser Ajemba ajanga ta angatet. Iba mapang nungi tenzuka arogotemi ayonga tamangertem lungjemer item temenen anema raraba tanü tashi rarayonga arur aser maneni raratsü. Yimtsüing aika nung village council Chairmani anir yimsüsürtemi meranga inyakba ajanga temelenshi tajung aika bener aruba ngua arudagi. Arogo lenirtem aser yimsüsürtem dang kanga pelatsü tim. Iba den ABAM aser lim arogotemi mapang shia sarasadem sentong ayonga agir. Tangatetertem aikati aruya aliba election atema sarasadema lümidagi. Tongpang tulu asünung khenyongi rangben temelenshi mangutsü akok saka tezü metangli kechiaser tanem tanemi temelenshi bener arudagi. Tamangertemi sarasademba nung tashi lir aser aseni mepibatem Tsüngremi langzüksü (Mat 7:7). Sarasadema lumiyonga temelenshi bener marur ta tasü meiti tezü tanga bilemetsü mapang masü saka tamang nung tali akangshia teraksatem anema maneni sarasademtsü ayongzüker.

Alima nung ali tashi election ya ajurua aotsü. Yimsüsüba menden nung amentsü atema tatartem shimba nung senso shiai shilem agitsü temeten agüja lir. Pei meyonngem (vote) amshitetsü jenjang ka tongtetbaji senso shiai temoatsü ta züngshitsüla. Iba ya apayuseta aser tangatetba nung amshitetsüji senso ka asoshi tongtipang. Meyongnem memenendaktsüi senso ajaki tangatetba aser ochi nung pei meyonngem agütsütsü ajungshir. Ibai ochi nung amshitetba ajanga alima yimsüsüba nung asenoki shilem tajung agir ta metetdi. ABAMi election merükteta agitetsü asoshi maneni sarasademtsü aser meranga inyaktsü. NBCC Clean Election Movement ajanga kechi print media nung agütsüogo iba dak sendakba nung General Secretary, NBCC kechi jangjashitsüogo, idakji ABAM nokdaka lir. Taoba mapangtem nung inyaka aruba ama aruya aliba election nunga arogo aser yimten lungjemer pei yimtsüing telungtet nung election merükteta agitsü ajungshir. Ibai inyaktetsü asoshi election mapang proxy amshiba, sen alemba, yi aser miim mozü ajanga nisungtem mulungsentsü menendaktsüba, item timtem ajak nungi jenbutetsü asoshi temzüng ozüing pei süngkümshi nung akangshidaktsüner.

Asen limai Khrista yimsü arur küm 152 buba nung ayaoka aor. Tsüngrem taochi ajanga Khrista Yimsü züina aoba nung asen Ao kini shilem tajung agia aruogo aser maneni agia aotsü. Yisu maru tashi Tsüngremi asen nem nungloktsüba tenyaba mapatem inyaktetsüji tamanger shia nungi Tsüngremi imlar. Süngjema melitetsüsa tanü asen tendak asen tamangba yimsü anokshitsüsa telemtetba balala agia inyaksangshibatem ajangshir. Tesem tesem nung khristantem reshikangshiba, tekülem ki raksatsüba, sayutsüngitsü nokdangba, Tsüngrem mekülemdaktsütsü ozüing tesashi yanglua nokdangba, missionary/evangelist tem tetsübu makai Tsüngrem osang proktsü mokoki kümdaktsüba, laishiba rongdoktsüba, khristantem aika Tsüngrem anemertemi zuka merenshiba aser tepsetba, ano aika. Item ya purateta jembibatem masü saka asangsang nung ataloker ta meteta arudang temulung tip metemi akümer. India ya tamangba yimsü aika aliba linük ka lir. Kati ka züngoktepba alitsüji kanga tongtipang. Koba political party südir süang, tamangba yimsü anema inyaker party anema asenoki ola adoktsü tang mapang ya lir. Nüburtem anisüngzuka yimjung nung melitetsüsa, Tsüngrem külemtsü tashi nokdangba inyakyim balala atongteta ozüing küma yanglur alentsü merangba yimsüsür küpokbo asenoki meliner ta angatetra item nemji asen meyonngem magütsütsü aser parnok asoshi sarasademtsüji tamanger shia mapa lir. Aruya aliba election mapang senso shiai tebilemdangba nung tashi ita tangateter senso tajung kaka ama ochishia pei meyonngem agütsütsü aser shilem tajung agitsü ayongzüker. Asen jakdang aliba election ya nüburtemi tangatetba nung akanga teindang shisatsü dener pei meyonngem ochishia agütsüba election ka sädaktsütsü ABAMi ayongzüker aser sarasademer.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Sydney tekülem kidang kotari agi atsüngba ya kiralongra mapa: Police

Sydney, Rongchii/April 16 (Agencies): Hombarnü Sydney tekülem ki ka nung kotari agi tamanger dak atsüngba ya tamangba yimsü tsütsü nungi ajungmesoba kiralongra mapa lir ta Australian police-i sangdongogo.

Assyrian Christ The Good Shepherd Church nung tekülem ki agidang bishop ka, priest ka aser tekülem kidang alir kar dak kotari agi atsüngba sülen arishi küm 16 tain tebur ka pua lir.

Nisung pezü yiru saka takum alok-alatsüsabo masü, ta police-i ashi. Iba lendong agütsüsang ya yiru.

Iba tatalokba ya arogo indang livestream nung tangoka idangjisa Wakeley tesem nung alirtem anisüngzük mekateti akum.

Australian police temi iba kiralongra mapa ya 'ideologically motivated' ta ashir. Tang tashi bushisüngdang sütagi, saka iba ya tamangba yimsü jenjang balaka nung amshiba ken o ka lir ta angateter ta shiogo.

Ajisüaka ketdangsür temi iba lendong agütsüsang tamangba yimsü sangdongtsü memulunger.

Arogoi iba lendong nung yirur alir priest ya Father Isaac Royel aser bishop ya Mar Mari Emmanuel ta sangdongogo. Bishop Emmanuel ya 2011 küm ordain asü aser pa ya nungtugu akum aser kensüh-osüh-a dener liasü aser pai sayutsüngiba ya social media nung repranger million aika lir.

Hombar aonung online nung morok mi jangrur ama iba lendong atalokba video prokshiba sülen ain adoka nisung telok kar Assyrian Orthodox Church bushia aru, koba city centre nungi south-west tsütsü kilometre 35 shi pilar lir.

Yangji azüdokshiba atema jashia alir nisung aika adenshia police den raratep, shirnok tekülem ki nüka liasü, kong lendong agütsüsang pua yua liasü.

Iba mapang police ana yiru aser ka dak longro aser fence palings agi aonba ajanga takum (jaw) raksa aser police indang gari ter raksatsü. Tekülem sentep kima rongrong adokba yong paramedics tem tetsübo agi tekülem ki telung nung ghonda asem dak tali atsükoka kazü.

Ato Kilonser Anthony Albanese-i national security

agency indang ajungben senden ka jatepa liasü.

"Aseno tesunep meimba linük ka lir... Tashiyim amshia azüdokshitsü atema tesem maka," ta pai nüburttem mesüzüka ashi aser pei sasa ozüng mamshitsü ajungshia liasü.

Hombarnep osangbener den jembidang New South Wales (NSW) Police Commissioner Karen Webb-i, bishop aser putir ya surgery agir aser tia kaa takum lir, ta ashi.

Lendong agütsüsang bishop anasai aodang o kar jembia aser ibaji tamangba yimsü dak rangloker liasü, aser livestream süa tekülem sentong agidang lendong agütsüba ya tekülem kidang alir arogopur kisüng masü saka online nung repranga alirtem dena amokmerenba lir ta police temi amanger, ta Webb-i ashi.

Temulung melemi pua alisang ya pa kisüng liasü aser police temi pa meteta liasü saka pa 'terror watch list' nungbo meliasü, ta lai ashi.

Lendong agütsüsang yagi taoba mapanga kotari amshia mapa tamajung inyakba osang lir aser 2020 nunga school nung blade amer aliba ngutet, ta state premier Chris Minns-i jangjatsü.

Aibelensang ya temeyong kar yirua surgery agia liasü aser pa ya pai bena aliba kotari agi yiru asü tekülem kidang adenshia alirtemi apudang yiruar mejangja, ta police-i ashi.

Sydney nung kanga nungtugu shopping centre ka

nungi kotari agi nisung tenet tsüngseter anogo ishika dang lir Assyrian Orthodox Church nung iba lendong ya atalok.

"Tang NSW nung alirtem tetsübo aser tejashi nung aliba angateter," ta Minns-i ashi. Paisa nüburttem dang süngjema alitsü ayongzük, aser kasaji tamangba yimsü aser lokti balala lenirtemia ayongzüka lir.

Mapa tamajung inyakba mechi mapa tamajung inyaktsü merangra ozüng indang tashi ajak amshia azüoktsü, ta pai ashi.

Ki o jen raksatsüba nung shilem agia alirtem bushitsü atema strike force adenshia lir aser Webb-i "Onoki na angutsü aser arutsü aser na aputsü," ta ashi.

NSW Ambulance indang tekolakbaia nüburttem dang yimya tajung amshitsü ashi.

Wakeley kiyong nungya Christian Assyrian kin tilaka adenshia alir, aser parnok ya timba Iraq aser Syria nung reshikangshiba nungi jena arurtem lir.

Yangji Bishop Emmanuel ya tejangja lenir ka lir. Ajisüaka pa ya Assyrian Church den tesendaktep mejungi lia aru aser ozüng sülen manidakba yong arogo nungia atsüngtsü aser pai arogo tasen tenteta liasü.

2021 küm pa ya COVID-19 tenokdangba anema nokdaker ka akum aser Australia nung lockdown ya alar yimya lir aser vaccine tem yagi mapa meinyaker, ta nokdaka liasü.

Alima nung Catholic putirtem ajema akumer

Rongchii/April 16, 2024 (Agencies): Alima nung 2021 nungi 2022 tsüngta Catholic nungertem tera timba kumaka putirtem maneni tajemba akumba statistics tasen ka ajanga sayur.

Vatican ajanga ita tetenzüklen 2024 Pontifical Yearbook aser 2022 Statistical Yearbook of the Church saya. Item kaket ya Vatican Secretariat of State's Central Statistical Office ajanga zülü aser Vatican Printing Press ajanga menünger kaket ayokba tesemtem nung lemshir.

Iba kaket ajanga alima nung Catholic Church dak kongshiba yimya balala indang asadanger, ta Vatican News ajanga ashi.

2021 küm alima nung baptized Catholic ya billion 1.376 aliba nungi 2022 küm billion 1.39 akum ta tang tesüsa züluba Statistical

Yearbook nung sayur, tetetzü shilem 1.0 renlok.

Catholic nunger timba züinba ya Africa (shilem 3) nung alitsü aser iba sülen Americas nung shilem 0.9 aser Asia nung shilem 0.6. Europe nung Catholic nütsüng kasashi million 286 lir aser Oceania nunga kasa dang lir.

Alima nung 2021 aser 2022 tsüngta putirtem tenüng zülutenba nung tera ajemer liasü. 2021 küm putir 407,872 liasü aser küm ka sülen tera ajema 407,730 liasü.

Alima nung putirtem ajemaka Africa (shilem 3.2) aser Asia (shilem 1.6) nung timba akum. Europe nung putir nütsüng shilem 1.7 agi ajem aser Oceania nung shilem 1.5 ajem. Americas nungbo kasashi dang lir.

Putir nütsüng ajemba mapang 2021 nungi 2022 tsüngta permanent deacons

ANOGO ABEN TSÜNGREM DEN

Ni aiatai

Idangji ni ashi, Ni aiatai! Kechiyong ni makaka; kechiaser ni temeli memerükba nisung aser ni temeli memerükba pur rongnung alir; kechiyong kü tenük agi chuba temeranger telok Kibuba nguogo.

Isaia 6:5.

Tamaren Tsüngrem anguba agi temenen tali jangjaa angatetdaksür aser shidakba peiji angur. Tsüngrem nema anguba agi temenen süoki ia mebilemer aser pei shidakbaji mejangjadaksür. Isaiai tebang agi meshitetba Tsüngrem sentsüwangshi mangu tashi pei sasa temeshi ta bilemba nung temulung süa liasü südi. Isaiai Tsüngrem tsüktepba agi idangyongjisa pa koda temenen aser pa meketa aliba pur koda memerük aji angu. Tsüngrem külemtsü aser memelenshir dang alitsübaji tamakoktsü. Asenoki shidakba Tsüngrem külemer ta sayutsübaji temulungjang melenshibaji lir.

Asenoki temenen alima den asenok sasa hai aura akar aser temenen taküm alir asü? Kar Tsüngremi aginüba taküm alidang asenok Tsüngremer jenjang nungi ajemzüka lua alir aser tajung junga aliba nisungji temeshi ta aseni repranger asü? Asenoki asen meketa alirtem den dang asenok temeshibaji medemdangra, asenok bendanga meshitetta aliba taküm ka lir ta amangdakja asenok ashioktsütsü akok. Aji saka kodang asenoki Tsüngrem ajurudir, asenok telangzübaji "Ni aitai!" ta alitsü.

Nai meketa aliri na aser alimaji balala ta majitetdaksü tashi na meketa aliri Yisu Khrista dak amangbaji nai mangutsü. Tsüngremi Pa temeshi aliba ama na meshitetdaksüner. Kodang Tsüngremi ne dak mapa inyakdir, idakji temerüktetba ne taküm nung alitsü ibaji alimai agütsüba dang nungi balaka asütsü. Alima, na meketa alirtem dena, ne temeshiba taküm jagi temeshi Tsüngrem tenzüktsü pua arutsü.

tem timba akum. Arogo ka nung deacon temi ketdangsüba Vatican News ajanga ashi.

maparen kar nung shilem agiaka parnoki mass bo manitetsü. Catholic Church nung religious women shilem 1.6 agi ajema 2021 nung 608,958 aliba

2022 küm 599,228 akum. Africa nung religious women shilem 1.7 agi timba akum aser Southeast Asia nung shilem 0.1 agi timba akum, aser South aser Central America nung shilem 2.5, North America nung shilem 3, Europe nung shilem 3.5 aser Oceania nung shilem 3.6 agi tajemba akum.

Maneni putir akumtsü azünger seminarians tem shilem 1.3 agi ajema akum. Africa (shilem 2.1) aser Oceania (shilem 1.3) nung seminarians tem timba kumaka alima nung danga region tem nung ajema akum.

Vocations tsütsü Europe (shilem 6), Americas (shilem 3.2) aser Asia (shilem 1.2) nung ajema akum.

AO OSHI ANGAZÜKDAK: TANÜ ANGAZÜKTSÜBA OJANG



Sünep

(v) tesüngjem, tiptema (peaceful)

* O tajung agi mulung süneper.

Sünepsünepa

(adj) süngjemsüngjema, yimjung nung (peacefully)

* Tsüngrem metetba kibong sünepsünepa alir.

OLONG PAITEP # 6759

Grid for OLONG PAITEP # 6759 with numbers 1-24 in a 6x4 layout.

TIPLÉN

- 1. Saku - (4)
6. Songjen - (7)
7. Mali/Tazüng - (4)
9. Tasen apok - (6)
11. Songtem - (3)
13. Ata liasü - (5)
16. Tzünglu den külemi tsüker - (3)
17. Aso tila - (6)
20. Tashi maküm - (4)
24. Tenüng kasa jatepba - (7)
25. Ki yangluba oset - (4)

LANGTSÜNGLEN

- 1. Taksep - (3)
2. Langtem - (5)
3. O tamendaktak - (4)
4. Nütsü tebuba - (3)
5. Anüngdang tesangwa - (3)
6. Apitet - (5)
7. Yagi jungdaksür - (4)
8. Anogo semer ka - (3)
10. _ _ _ tatsü - (3)
12. Tebur kidong aser zünga kasatsüngdajatepba - (4)
14. Pela agizükba tapu ka - (5)
15. Tenüng atet - (3)
18. Mejanga onü - (5)
19. Talak techira - (4)
21. Maneni - (3)
22. Nübo teyi - (3)
23. Meshi - (3)

OLONG PAITEP # 6758 TELANGZÜBA

TIPLÉN :

- 1. Yiar, 3. Tesola, 7. Yimra, 8. Tangar, 9. Peria, 10. Tanur, 11. Tasen, 13. Lemjem, 15. Tambu, 16. Khuret, 17. Sang.

LANGTSÜNGLEN :

- 1. Yimti, 2. Amen, 4. Shiner, 5. Alaka, 6. Satan, 9. Putet, 10. Tembar, 11. Tatok, 12. Amang, 14. Jala.

NAI-A YA METETTER MA

"LARGEST DISPLAY OF MERINGUE-BASED SANDWICH COOKIES"



Lovely Professional University (LPU) nung School of Hotel Management & Tourism ajanga world record tasen ka yanglutetogo aser ibaji "largest display of meringue-based sandwich cookies" lir.

April 16, 2024 nü LPU campus nung kaketshirtemi "Macarons" ta ajaba meringue-based sandwich cookies teimtiba sayu aser parnoki India linük wako bendenlokba ajanga sentong tali meraketsü.

Priyanka Gandhi Vadra-i Assam aser Tripura semdang



Guwahati, April 16, 2024

(Agencies): Congress lenir Priyanka Gandhi Vadra-i Mongulbarnü Assam nung Jorhat Lok Sabha candidate Gaurav Gogoi aser Tripura nung Tripura West Lok Sabha constituency candidate Ashish Kumar Saha na atema nüboyimtsüba sentongtem nung denogo.

BJP-i Constitution melenshinür aser iba ajanga nübortemi timtem ajurutsü ta Jorhat nung roadshow nung jembidang Priyanka-i ashi.

Lok Sabha elections nung opposition teloktepi takok ngura Assam nung süngolu nung mapa inyaktertem taa tutsütsü ta lai ashi.

"Küm ana-asep tejaklen assembly elections magidang ni Assam-i aru aser idangji Congress-i sorkar kümra ni taa tutsütsü nangzük saka nenoki BJP ang shimtet aser parnoki Rs 250 shi ka nungi taa metutsür" ta Priyanka-i ashi.

"Ni nenok dang maneni ashir, Centre nung onoki sorkar kümra süngolu nung apa inyaktertem taa tutsütsü aser ibaji onok manifesto nung lir" ta laisa ashi.

BJP-i kümsük asempen

tashi sorkar yimsü asütsü tashi ngura Indian Constitution melenshitsü aser nübortem timtemtsü kechiyong temeten aika agientsü, ta lai ashi.

BJP lenirtemi nüboyimtsü atema arudang onük meputepem jembir, ajisüaka Gaurav Gogoi-ibo teti nübortem indang tebilemstütem jembia arur, ta Priyanka-isa ashi.

"Linük nung mapa manguba khuret kanga ulura kümogo saka Prime Minister Narendra Modi-i tawa interview ka nung iba onük anaben dang jembir. Kechisarena nung jenjang atuba azüoknura Congress nem vote enokjang. Tamangba yimsü aser kin tangatetba nung vote teinoktsü" ta laisa metetdaksü.

"Citizenship Amendment Act (CAA) ya Assam Accord anema lir. Anungji nenoki CAA mapa metenzükdagnura aser jenjang atuba aser mapa manguba nung temulung agütsüdadksünura Congress nem vote enokjangma" ta Priyanka-isa ashi.

Jorhat nung Guarav Gogoi-i BJP nungi tang teinyakdak MP Topon Kumar Gogoi den tokteptsü. April 19 nü Jorhat

Lok Sabha constituency nung polling asütsü.

Jorhat semdangba sülen Priyanka Gandhi Vadra Tripura-i ao aser idakji Tripura West nung roadshow tulu ka nung shilem agia liasü.

Tripura West Lok Sabha constituency nung Congress candidate Ashish Kumar Saha atema iba sentong ayonga agi.

Congress-i loktiliba nung telemsa ajak nem temeten agütsütsü. Onoki mapa lakh 30 agütsütsü, aluyimer nem minimum support price (MSP) agütsütsü, tetsür nem küm shia subsidy Rs 1 lakh agütsütsü, ali malir nem ali agütsütsü aser tanurtem class 12 tashi free education agütsütsü ta Priyanka-i ashi.

"Taküm Lok Sabha elections nung Tripura nung alirtemi temelenshi tajung aser terenlok lenmang shimtsü maongka tongtipang ka ajurua lir" ta Priyanka-isa ashi.

Tripura West Lok Sabha constituency nung state Congress President Ashish Kumar Saha-i BJP candidate aser taoba Tripura Chief Minister Biplab Kumar Deb den tokteptsü.

Arunachal nung telungpurtemi NPP candidate yaritsü amokmerener

Dibrugarh, April 16, 2024

(Agencies): Arunachal Pradesh nung assembly elections agitsü anogo ishika dang lia NSCN-KYA-i election maparen nung shilem agiba osang angazüker.

Longding district kübok Longding Pumao assembly constituency nung NSCN-KYA telungpurtemi nübortem dang

candidate ka yaritsü tetuyuba agütsür.

Longding Pumao assembly constituency kübok yimtsüngtem nung iba tetuyuba züluba leaflets alamer.

Longding Pumao assembly kübok Niuasa, Longkhaw, Mintong aser Longphong yimtsüngtem nung NSCN-KYA telungpurtem lir aser parnoki

prangpong amer National People's Party (NPP) candidate Thangwang Wangham nem vote enoktsütsü amokmerena senzür.

Telungpurtemi Bharatiya Janata Party (BJP) lenirtem aser züngsemtem dak tenük yoka mapa inyaker aser parnok dang NPP candidate yaritsü mesüra timtem ajurutsü ta amokmerener.

ULFA-I-i Namdang nung Assam Rifles amakba atema tenüng agir

Guwahati, April 16, 2024

(Agencies): April 16, 2024 anepdang 8:00 nungi 8:30 ako meta Changlang nungi Margherita-i aoba Assam Rifles gari asem amak.

Namdhang anasa telungpurtemi amakdang AR sepaitemi meyiper khatap saka idangji jawan Hawaldar Om Prakash dak injang agi khashi.

ULFA-I nung captain Rumel Axom-i iba tatalokba atema tenüng agiba metetdaksüogo. 13th Assam Rifles garitem raksatsü aser sepaia aika yirutsüogo ta pai ashi.



Security forces-i lendong atalokba tesemi media meyokba ajanga osang tejangja miimbanga lir. Ajisüaka sepaia

aika yirur tayimtsü ajanga anir ogo ta ULFA-I-i ashi.

"Assam Rifles patrol gari asem Changlang nungi Margherita-i aodang tanep 8:30 ako meta Namdhang anasa amak. Idangji sepaitemi meyiper khatap aser sepaia ka injang agi yiru aser pa Military Hospital Jorhat nung anepaludar saka tajungba kümogo" ta AR sangdong ka nung ashi.

Namdhang anasa sepaitem amakba ajanga Assam-Arunachal Pradesh arrtsülen security tsütsü lendong aliba sayur.

Pakistan aser Afghanistan nung yipru agi nisung noklang aika asü



Pakistan nung tzunglu kanga sashia aruba ajanga nisung 49 asü aser ki o jen aika raksaba sülen ketdangsürtemi linük southwest tsütsü state of emergency sangdong. Anogo asem tsüngi-tsüngerperet den tzunglu kanga sashia aruba ajanga nisungtem ya asü ta ashir.

Islamabad, Rongchii/April 16 (Agencies):

Pakistan aser Afghanistan nung tzunglu kanga sashia aruba den tzungi aiba ajanga nisung noklang ka süogo. Pakistan nung anogo ishika tzunglu kanga sashia arua yipru aiba sülen nisung 50 süogo, ta ketdangsürtemi Mongolbarnü metetdaksü.

Ketdangsürtemi sa emergency service tem dang kumkuma alitsü atema mepeshia metetdaksüogo.

Kasa mapang nung Afghanistan nunga kasa anogo nisung 50 asüba indang osang ketdangsürtemi lemsatepogo.

Pakistan nung asürtem ya timba northwestern province Khyber Pakhtunkhwa nungi lir, kong tzunglu kanga sashia aruba aser tzumetsung aruba ajanga anentsüh aludaksüba den ki aika raksatsüogo aser süngtong aika tera dena rakteta tetsükdaksü aser teraksatsüba aika adokdaksüogo.

Tzunglung ajanga northwest aser eastern Punjab province nung ki aika chirepogo. Provincial disaster management authority otongdar kati ashiba agi, tang tashi nung nisung 21 süogo aser iba hopta ano tzunglu kanga sashia arutsü imlar.

Afghanistan den arrtsü nung aliba northwestern Khyber Pakhtunkhwa province indang disaster management authority otongdar kati ashiba agi, iba province nunga nisung 21 süogo.

Tzunglu yagi linük yimtiba Islamabad-a kongshi aser southwestern Baluchistan province nung nisung tenet tashi süogo. Tzunglu kanga sashia aruba sülen Peshawar yimti aser Baluchistan province yimtiba Quetta nung lenmangtem metsünga liasü.

Ato Kilonser Shehbaz Sharif-i TV nung sangdong ka ajanga, pai lendong agi kongshir alirtem nem teyari agütsütsü atema ketdangsürtem nem tetuyuba agütsüogo, ta ashi. Lendong agi tesem aika kongshiba sülen ketdangsürtemi

linük southwest nung state of emergency ka sangdongogo.

National Disaster Management Authority (NDMA)-i, emergency service tem dang kumkuma alitsü atema tetuyub agütsüogo, kechiyong tsüngsang mopung tamajungba agi linük kongshitsü lir.

Kasa mapang nung Afghanistan nunga anogo ishika tsüngda tzunglu kanga sashia aruba ajanga tzumetsung adokdaksüba sülen nisung 50 süogo aser nisung 36 yiruogo, ta linük Disaster Management Authority-i Mongolbarnü metetdaksü.

Iba lendong nung ki 600 dak tema raksago aser kiset shiruru 200 shi süogo, ta Taliban ketdangsürtemi metetdaksü. Tzumetsung agi alu yima aliba tesem tuluka raksatsüogo aser lenmang kilometer 85 dak tema raksatsüogo, ta ketdangsüri ashi.

Linük nung province 34 aliba nungi 20 tzumetsung agi kongshiba sülen Afghanistan-i kibong 23,000 shi nem teyari agütsüogo.

Afghanistan küm aika mepetmesü nung aruba aser yipru aser menoknok lendong balala agi kongshiba ajanga timtema aliba mapang ka nung tang ano iba yipru ajanga nüburtem nem timtem agütsüdar.

Taoba küm October ita linük anüolen aliba Heart province nung menoknok ishíben anokba sülen nisung 1,500 süogo, ta UN-i metetdaksü.

Local media den sensaksemba mapang Pakistan Peoples Party mendenbuba Bilawal Bhutto Zardari-i ashiba agi, tzungi dak sendakba lendong balala aiben ajangshiba ya tzumopung melenshiba ajanga lir.

Alim tzumopung melenshiba nung Pakistan shilem kangabo mali saka tzumopung melenshiba ajanga kongshiba linüktem rongnung Pakistan-a ka lir.

2022 küm tzunglurowa mapang tzunglu kanga sashia aruba ajanga tzumetsung aser anentsüh lendong tulu ajangshiba sülen Pakistan nung nisung 1,739 asü aser nisung million 33 dak kongshia liasü. Tzumetsung tesashitba aruba mapang linük shilem asemsü nung kabo tzü agi metsünga liasü.

US-i takaratiba nung Israel nem teyari agütsütsü jenjang agir

Washington, Rongchii/April 16 (Agencies): United States-i Israel dang parnoki Iran makra iba rara nung parnok shilem magitsü ta shiogo, ajisüaka teyari agütsütsü atema sensaksem bangadaka aliba tejakdangi bener aotsü inyaktepdar.

Tir Joe Biden-i Deobar aonung Israel Ato Kilonser Benjamin Netanyahu dang phone ajanga Iran-i Israel amakba atema telangzüba agütsüra iba nung US-i shilem magitsü ta shiogo.

Alima kintem den külemi US Tir-i azüzüka inyaksü atema ayongzükaka, Israel nem teyari agütsütsü atema sensaksem bangadaka aliba tejakdangi bener aotsü merangdar aser iba ya agizükra Washington-i Netanyahu nem USD billion 14 alang teyari agütsüba angutsü.

Iran-i Israel dak drone aser missile 300 dak tema khaloktsüogo, ajisüaka iba ajanga teraksatsüba kecha balaka madok, kechiyong missile aser drone tem timba US, United Kingdom, France aser Jordan-i teyari agüja Israel-i khadanga liasü.

Israel indang züngsem pongu agi kümteba cabinet koba

Deobarnü nikongtsütsü ajurutepogo, parnoki Iran amaktsü pusema liasü, ta osang ajanga metetdaksü. Ajisüaka koba mapang amaktsü aser koma amaktsü iba dak sendakba nung tangatetep ka dangi marutet.

Honibar aonung Biden-i mepeshiba sülen Republican lawmaker aser House Speaker Mike Johnson-i Deobarnü ashiba agi, pai US den sendaktepa alirtem nem USD billion 95 alang military teyari agütsütsü atema sensaksem bangdaker aliba tejakdangi bener aotsü merangtsü.

National security package sota ayurtem rongnung Johnson ya ajanga dang tongtiba lir. Iba packaage ya agizükra Israel nem USD billion 14 alang aser Ukraine nem USD billion 60 alang military teyari agütsütsü aser iba den Asia nunga US den sendaktepa alirtem nem teyari agütsütsü.

Johnson-i Fox News Channel indang Sunday Morning Futures dang ashiba agi, pa aser Republicans temi Israel den nokdaksü nüngdaka aliba angateter aser parnok iba hopta teyari agütsütsü merangtsü.

Israel-i Iran amaktsü nangzük, Tehran-i kodanga mamshiba nok-nü amshitsü ashir



Syria yimtiba Damascus nung aliba Iran consulate nung Israel-i April 1, 2024 nü amakba sülen tangokba noksa ka yangi angur. Iba consulate amakdang Iranian Islamic Revolutionary Guard Corps (IRGC) tanishir Mohammad Reza Zahedi tepset aser iba sülen Iran-i tayang kepzüka Isral dak drones aser missiles khalokja Middle East nung tensa mejungi kumogo.

Tel Aviv/Tehran, Rongchii/April 16 (Agencies):

Israel nung news outlet Channel 12 ajanga ashiba agi, Iran-i tashiyim amshiba ya mangu ama meyutsütsüla aser tejangja aser tashiyim amshia telangzüba agütsütsü langa lir, ta Israel war cabinet ajanga Hombarnü ashi.

Tehran nem "equation" amenokdaksütsü memelatsü, koba parnoki amakba ajanga amenoktsü meranger, ta parnoki ashi.

Israel air force-i Iran anema meyiper amaktsü renemshir ta parnoki ashi saka mapang tejangja magütsü. Israel air force nungya US nung yangluba F-16, F-15 aser F-35 fighter jets squadron ka lir.

Ajisüaka tayang kepzüka mera agiba ajanga region nung rara tuluba madokdaksüner, ta Israel-i jangjashiogo.

US-i Israel dang aremzüksü ajungshia lir aser US Tir Joe Biden-i Ato Kilonser Benjamin Netanyahu dang Iran anema tayang kepzüka raraba nung US-i shilem magitsü ta

tekumdangtsü shiogo.

Biden-i iba atema süoki ia bilemaka Israeli defence minister Yoav Gallant-i US defence secretary Lloyd Austin dang, hopta tatemlen Iran-i missiles aser drones amshia amakba atema telangzüba agütsütsüba dak alaka danga lenmang kecha mali, ta Deobarnü shiogo.

"Israel-i mera agitsü asadanger aser Israel dak missiles aser drones aika khaloktsüba atema tayang kepzüka telangzüba agütsütsü," ta Israel Defence Forces (IDF) tekolakba aser Israel Defense Force indang chief of staff Herzi Halevi-i Hombarnü ashi.

Hombarnü Iranian foreign minister Hossein Amir-Abdollahian-i UK foreign secretary David Cameron den phone ajanga jembiba sülen Iran-i sangdong ka agütsüba nung Israel dang tekumdangtsü ashi aser tensa tamajungba mekumdaksüner, ta shia liasü.

"Israel-i tendangtsü merangra, onoki telangzüba

agütsütsü aliba ya kanga ilonga, tashi taitba aser tesashiba asütsü," ta Amir-Abdollahian-i ashi.

British Foreign Secretary David Cameron aser France Tir Emmanuel Macron natia tayang mekepzüksü shia lir.

Iran-ia iba ken o tembangogo ta züngshir aser Israel-i ano aibelenra Iran-i tesashiba nung telangzüba agütsütsü, ta Tehran-i shia lir.

Israel-i tensa tamajungba kumdaksütsü merangba koktettsü asoshi taoba mapang mamshiba nok-nü amshitsü Iran renema lir, ta Iran indang National Security and Foreign Policy Committee odongtar Abolfazl Amoui-ia ashi.

"Israel-i tashiyim amshiba den onoki tokteptsü aser telangzüba agütsütsü. Taoba mapang mamshiba nok-nü tem amshitsü onok renema lir. Tensa ajak atema onok sentong lir aser Zionists dang kanga kumdanga inyaksangshitsü ayongzükter," ta Amoui-i ashi.

Babar lenisüba nung Pakistan team NZ den asayatsü



New Delhi, Rongchii/April 16 (Agencies): Pakistan maneni Babar Azam lenisüba nung Brehostibarnü nungi tenzuka New Zealand den T20I asaya pongu asayatsü. World Cup asayatsü hopta ishika dang lia iba asayamung asayatsü aser iba asayamung atema New Zealand team nung tongtibang asayar aika mali.

Shaheen Shah Afridi lenisüba nung team asayamung ka asayaba sülen mimlai lia taoba ita Azam nem captain mapa tanaben agütsüogo aser iba ajanga team nung tangatettep ka malitsü ta bilemer.

Ajisüaka team head coach Azhar Mahmood-i, iba asayamung atema shimmer aliba asayartem dak tamang akaba lemsatepogo aser June ita United States aser West Indies nung asayatsü aliba World Cup atema renemshiba mapang asayartemi metongmejentem ajangettetsü ta tamang akaba lemsatepogo.

Taoba küm one-day World Cup nung kanga kara tsükatokba sülen Pakistan team

nung temelenshi adoka Azam-i format ajak nung captain mapa toktsüba den head coach Mickey Arthur aser PCB mendenbuba Zaka Ashraf natia mapa tokja liasü.

Iba sülen Interior Minister Mohsin Naqvi-i mendenbuba mapa agizük aser selection committee yanglushi, aser iba ajanga Azam tanaben captain kümogo. Maneni iba asayamung nung fast bowler Mohammad Amir aser all-rounder Imad Wasim nata asayaba angutsü. Tena ya international asaya nungi anener liasü.

Kasa mapang nung New Zealand-i taoba ita security team ka yokogo. NZ-i 2021 küm security dak sendakba nung asayamung ajungbena thija liasü saka 2023 küm anaben tashi Pakistan-i oa asayaogo.

NZ team nung temaba jenjang nung asayaba asayar teku mali, kong Kane Williamson densema lir, shiba tang IPL asayadar. Pa melena Michael Bracewell lenisüba nung lanur asayartem

asayatsü.

Team nung Tim Southee aser Adam Milne o Finn Allen nungera densema mali. Iba asayamung nung tang mezüngbuba all-rounder Zac Foulkes, batsman Tim Robinson, aser seamer Will O'Rourke nunger asayaba angutsü.

Asayamung nung mezüngbuba asaya asem Rawalpindi nung asayatsü aser tanungba ana Lahore nung asayatsü.

Pakistan team: Babar Azam (captain), Abrar Ahmed, Azam Khan, Fakhar Zaman, Iftikhar Ahmed, Imad Wasim, Abbas Afridi, Mohammad Rizwan, Mohmmad Amir, Irfan Niazi, Naseem Shah, Saim Ayub, Shadab Khan, Shaheen Shah Afridi, Usama Mir, Usman Khan, Zaman Khan.

New Zealand team: Michael Bracewell (captain), Mark Chapman, Josh Clarkson, Jacob Duffy, Dean Foxcroft, Ben Lister, Cole McConchie, Jimmy Neesham, Will O'Rourke, Tim Robinson, Ben Sears, Tim Seifert, Ish Sodhi, Zac Foulkes, Tom Blundell.

Major League Cricket: Head Washington Freedom nungi asayatsü



Rongchii/April 16, 2024 (Agencies): Australia nunger cricket asayar Travis Head taruba Major League Cricket (MLC) 2024 külem Australia nunger asayar Steven Smith den Washington Freedom nung adentsü renema lir.

Iba asayamung ya T20 World Cup tembangba sülen July 4 nü nungi tenzuka asayatsü. World Cup sülen anisüngzüksü melena Head-i maneni asayatsü asoshi telemtetba agiogo aser ibayongji pa MLC nung asayaba angutsü.

Australia team September ita tashi kanga mazüngi asayatsü lir aser England nung oa white-ball asayamung ka masaya tsüngda Head-i MLC nung

shilem agitsü telemtetba agiogo.

Head tang Indian Premier League (IPL) 2024 nung Sunrisers Hyderabad nungi asayadar aser pai pa asayaba yimya tajung sayua tang tashi nung asaya pezü nung run 133 yanglur lir. Tang tashi nung pa indang average 33.25 aser strike rate 172.73 lir.

T20 World Cup nung Australia team-i kanga takok ngua asayaba sülen Head-i kidang February ita West Indies den white-ball asayamung ka ayongzuka asayaba nung shilem magitsü telemtetba agia liasü.

Washington Freedom team nung Head aser Smith na taoba mapang Australia captain Ricky Ponting kübok asayatsü, shibai

tawa Washington Freedom indang coach mapa agizükogo.

Smith ya taoba küm nungi Freedom indang brand ambassador lir. Iba team ya local Australian team, New South Wales (NSW) den high-performance dak sendakba nung tenanzüktepba ka yanglur lir.

Head aser Smith na den ano Washington Freedom-i tawa New Zealand nunger all-rounder Rachin Ravindra anisemba aser taoba season asayaba asayar Marco Jansen aser Akeal Hosein nata tanaben anisemba sangdongogo.

MLC tanabuba season nung Head aser Smith na dang masü saka Australia nunger asayar aika densema lir. Adam Zampa (Los Angeles Knight Riders), Spencer Johnson (Knight Riders), aser Tim David (MI New York) nungera taruba asayamung nung team balala nungi asayatsü atema renema lir.

Bangladesh den asayatsü atema India tetsür team sangdongogo

Rongchii/April 16, 2024 (Agencies): Bangladesh den taruba T20 asayamung atema India tetsür team Hombarnü sangdongogo. Team nung Royal Challengers Bengaluru spinner Asha Sobhana aser Mumbai Indians' Sajana Sajeevan na tang mezüngbuba züngoksemogo.

Iba team ya Harmanpreet Kaur lenisüba nung asayatsü aser la nem Smriti Mandhana-i teyari agütsütsü.

Iba asayamung ya April 28 nü tenzüksü aser April 9 nü tembangtsü. Asaya ponguprongla Sylhet indang SICS nung asayatsü. Mezüngbuba asaya April 28 nü asayatsü aser tanabuba aser tasembuba asaya April 30 aser May 2 nü asayatsü. Tatembangbuba asaya ana ya May 6 aser May 9 nü asayatsü. Asaya ajak nikongtsütsü 6 ako nungi tenzüksü.

RCB-i WPL akokba nung Sobhana-i tongtibang shilem agia lai asaya 10 nung wicket 12 agi. Kasa mapang nung Sajeevan shiba Mumbai Indians

nungi asaya liasü, laia tawa Pune nung tembangbuba Inter-Zonal red-ball asayamung nung semifinal asayaba mapang run 74 yanglua liasü. La ya ano off-spinner lir.

Maneni RCB nungi asayar Shreyanka Patil-a team nung züngoksemogo aser Hemalatha-a tanaben team nung züngoksemogo. Team nung pacer tem rongnung Renuka Singh Thakur, Titas Sadhu aser Pooja Vastrakar nunger densema lir.

Left-arm spinner Saika Ishaque, shiba taoba küm WPL nung kanga takok ngua asayaba sülen India tenüng nungi asayaogo, la-a team nung züngoksemogo.

India team:

Harmanpreet Kaur (C), Smriti Mandhana (VC), Shafali Verma, Dayalan Hemalatha, Sajana Sajeevan, Richa Ghosh (wk), Yastika Bhatia (wk), Radha Yadav, Deepti Sharma, Pooja Vastrakar, Amanjot Kaur, Shreyanka Patil, Saika Ishaque, Asha Sobhana, Renuka Singh Thakur, Titas Sadhu.

Paris Olympics atema Olympia nung milenpong tsüklokogo



Rongchii/April 16, 2024 (Agencies): Paris 2024 Olympic Games atema milenpong Mongolbarnü Olympia nung sentong ka agiba mapang tsüklokogo aser iba ajanga July 26 nü nungi tenzuka asayatsü aliba asayamung atema küm tenet tashi renema aruba tatembangbuba shilem tenzükba sayur.

Tsüngsang majungba ajanga Greek actress Mary Mina, shibai high priestess ka shilem agia liasü, lai milenpong tsüklokotsü atema parabolic mirror mamshi-i milen tanga ka amshia liasü.

"Rara aser mangatettep agi meketbanger timtem nung aliba mapang angoshi item tesempatep, raratepba aser osang tamajung dang angashiba agi nüburtem laktetogo," ta International Olympic Committee (IOC) Tir Thomas Bach-i sentong nung o jembiba mapang ashi.

"Asenok ajak longjemdaksütsü aser timla agütsütsü atema langka nungdaker. Olympics milak koba tanü asenoki tsüklokler iba ya iba timla indang temaitsü lir," ta paisa shisem.

Iba milenpong ya anogo 11 Greece longa bener senzüba sülen Athens nung Panathenaic stadium nung Paris Games organizers tem nem April 26 nü formally agütsütsü. Iba stadium nung ya mezüngbuba modern Games asaya liasü.

Iba sülen milenpong ya 'Belem' rong nung bener anogo asem jajatsü aser iba sülen May 8 nü Marseille atongtsü, kong yimti rongmendak sentong nung nisung 150,000 shi-i shilem agitsü imlar.

France nung iba milenpong ya anogo 68 tashi tesem balala sema bener senzütsü aser July 26 nü Paris nung Olympics indang milak tsüklokla tembangtsü.

BILEMDANGANG

"Meyilongi dang süaka langtsüngi masü saka tejakleni oang."